

08/12/1999

Malaysia bantah laporan majalah FEER

KUALA LUMPUR, Selasa - Malaysia membantah laporan majalah Far Eastern Economic Review (FEER) yang memetik Presiden Indonesia, Abdurrahman Wahid, sebagai berkata bahawa Datuk Seri Dr Mahathir Mohamad memintanya menjadi orang tengah bagi merapatkan hubungan negara ini dengan Israel.

Sambil menyifatkan laporan itu tidak berasas, Menteri Luar, Datuk Seri Syed Hamid Albar berkata, Dr Mahathir tidak pernah meminta pemimpin Indonesia itu membantu mengeratkan hubungan Kuala Lumpur dengan negara Yahudi itu, termasuk dari segi komersil.

"Malah, isu Malaysia membentuk hubungan dengan Israel tidak langsung diutarakan oleh Perdana Menteri dengan Abdurrahman ketika pemimpin Indonesia itu melawat Malaysia pada 6 dan 7 November lalu.

"Berikutan itu, Malaysia membantah sekeras-kerasnya kenyataan Abdurrahman jika laporan yang memetikanya sebagai berkata demikian adalah benar," katanya dalam sidang akhbar di Wisma Putra, di sini hari ini.

Menurutnya, Wisma Putra sudah menyuarakan rasa kesal kepada Kuasa Usaha Sementara Kedutaan Indonesia atas perkara itu.

Syed Hamid turut mengarahkan Duta Malaysia di Indonesia menyampaikan rasa kesal itu kepada Jakarta.

"Pendirian Malaysia berhubung Israel masih kekal, iaitu kita tidak akan mewujudkan hubungan diplomatik termasuk secara tidak rasmi," tegasnya.

Malaysia dan Indonesia tidak mempunyai hubungan diplomatik dengan Israel.

Ruangan 'Intelligence' edisi 9 Disember FEER memetik Abdurrahman sebagai berkata, Malaysia mahu Indonesia mewakilinya sebagai orang tengah (untuk merapatkan hubungan Kuala Lumpur-Tel Aviv).

Tetapi, Abdurrahman berhasrat untuk menggerakkan hubungan perdagangan dengan negara Yahudi itu, kata FEER.

Ia menyatakan bahawa pemimpin Indonesia itu juga berkata, Dr Mahathir mahu mengambil langkah yang sama. Abdurrahman dikatakan memberitahu demikian kepada pemberita yang mengikuti lawatannya ke Asia Barat.

"Mereka tahu kami adalah rakan Israel," lapor FEER yang memetik Abdurrahman sebagai berkata.

Diminta mengulas sikap Abdurrahman yang 'mudah memberi pandangan,' seperti kenyataannya bahawa seseorang itu hanya perlu ke padang golf jika mahu mencari menteri di Malaysia, Syed Hamid berkata:

"Abdurrahman berkata, kenyataannya itu adalah satu pujian kerana beliau sebenarnya berkata, bahawa menteri Malaysia masih membincangkan dasar negara meskipun di padang golf."

(END)